

dr. Kalich a zarjadnik domu chcetaj so prócować, zo bychmy pjenjezy na dom za hišće nižšu dań dostali. Zjawna próstwa k Serbam wo dary za dom M. S. ma so trochu powjetšena z nowa a časćišo w Serbskich Nowinach woćišćować, jako tež přikhadźace dary. Jako revisoraj pokładnistwa M. S. postajištaj so k. farań Jenč (kotryž ma tež jejne starožitnosće revidować) a k. kapłan Skala. Skónčnje bu k. farań Wendt z Čorneho Khołmca jako sobustaw přijaty. Do aktow dawa so kwitowanje na horjeka spomnjene 500 hr. a zapis někotrych darow na wurunanje summy.

8) Posedženje předsydstwa a wubjerka, 28. měrca 1887. Přitomni: kk. Hórnik, farań lic. Imiš, farań dr. Kalich, kantor Kapleř, překupec Mjerwa, referendar Mütterlein a kapłan Skala. Najprjedy wuradźuje so programm za hłownu zhromadźiznu na třeleńni. Porjad budže, kajkiž je hewak. Dokelž je 40. wopomnjeće wobstaća M. S., budže zhromadny wobjed maćičnikow a hosći, kotrež so w Serb. Nowinach přeproša. Potom wudźěli so stipendium Kraszewskeho za gymnasiastow. Dla wotemrěća (19. měrca) tutoho přecela M. S. a našeje studowaceje młodžiny, wjelesławneho spisowarja, na kotrehož w tych dnjach tež cuze ludy spominachu, dawa so serbske nutrne sobužarowanje z jeho narodom do protokolla. Tohorunja připomina so přezažna smjerc (13. měrca) k. kapłana Nowaka w Kulowje, sobustawa M. S.

Wučahnył M. Hórnik.



Nekrologaj XXIV. a XXV.

H a n u š K n j e z ,
wučeř w Móšecach.

* 22. februarja 1863. † 14. februarja 1887.

Młodeho, rjane nadźije wubudźaceho narodowca smy zhubili! Tak prajachmy sebi při smjerci tutoho njeboćičkeho. Spočatk jeho skutkowanja běše tajki, zo pola njeho wjetšu wutrajnosć a wobstajnosć w často njedzakownym, ale za zdźělanosć luda jara trěbnym dźele za Serbowstwo wočakowachmy, dyžli smy hewak w našich wobstojnosćach widžeć zwučeni. Njebohi Knjez wězo najprjedy swoje zastojnstwo derje dopjelnješe a měješe jako wučer